



**KEMENTERIAN PERTANIAN DAN INDUSTRI  
MAKANAN**

***Ministry of Agriculture and Food Industries***

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web :

[www.mafi.gov.my](http://www.mafi.gov.my)

---

## **KENYATAAN MEDIA**

### **YB DATUK SERI DR RONALD KIANDEE KETUAI DELEGASI MALAYSIA SECARA MAYA PERSIDANGAN PERTUBUHAN MAKANAN DAN PERTANIAN BANGSA- BANGSA BERSATU (FAO) KALI KE-42 SECARA MAYA**

**PUTRAJAYA, 19 JUN** -- Menteri Pertanian dan Industri Makanan, YB Datuk Seri Dr Ronald Kiandee telah mengetuai Delegasi Malaysia secara maya Persidangan Pertubuhan Makanan dan Pertanian Bangsa-Bangsa Bersatu (FAO) Kali ke-42 yang telah diadakan di Rome, Itali pada 14 hingga 18 Jun 2021.

Delegasi Malaysia turut dianggotai oleh TYT Dato' Abdul Malik Melvin Castelino, Duta Besar Malaysia ke Itali sebagai Wakil Tetap Malaysia ke FAO.

Persidangan ini dimulakan dengan ucapan dari Ketua Pengarah FAO, Dr Qu Dongyu, Presiden Itali Sergio Mattarella dan Pope Francis.

Persidangan ini yang melibatkan Sesi Plenari, Commission I dan Commission II telah disertai oleh delegasi dari 183 negara ahli melibatkan lebih dari 1,300 delegasi termasuk 119 Menteri dan Timbalan Menteri negara-negara anggota.

Dalam kenyataan Malaysia yang telah disampaikan oleh YB. Datuk Seri Dr Ronald Kiandee pada persidangan berkenaan dengan tema "AGRICULTURE FOOD SYSTEMS TRANSFORMATION: FROM STRATEGY TO ACTION", beliau telah menekankan agenda jaminan keselamatan bekalan makanan negara bertujuan memastikan bekalan makanan yang bukan sahaja mencukupi tetapi juga mampu dimiliki, selamat dan berkualiti.

Pada masa ini, Dasar Agromakanan Negara 2.0 (NAP 2.0) 2021-2030 sedang dimuktamadkan dengan fokus utama untuk memastikan sistem rantai makanan negara dapat mendepani cabaran sekuriti makanan dengan mengambil kira input serta kerjasama pelbagai pihak termasuk Kementerian, agensi, ahli akademik, sektor swasta serta Pertubuhan Bukan Kerajaan (NGO).

Seiring dengan perkembangan teknologi baharu dalam era digitalisasi serta adaptasi kepada Revolusi Perindustrian 4.0 (IR 4.0), YB. Datuk Seri Dr Ronald Kiandee memaklumkan berkenaan peranan Wawasan Kemakmuran Bersama 2030 yang diberi penekanan di dalam Rancangan Malaysia ke-12 (2021-2025) dalam meningkatkan

produktiviti, sistem sokongan dan perkhidmatan, serta memperkasa rantai nilai makanan yang secara langsung menyumbang kepada kelestarian sistem makanan.

Modenisasi sektor agromakanan akan turut dipacu melalui adaptasi mekanisasi dan teknologi dalam usaha untuk meningkatkan sumbangan sektor pertanian kepada Keluaran Dalam Negara Kasar (KDNK).

Persidangan FAO kali ke 42 ini juga membincangkan FAO *Strategic Framework 2022-2031* yang dibangunkan melalui sesi konsultasi bersama negara-negara ahli serta rakan kerjasama FAO. Malaysia menghargai usaha membangunkan kerangka strategik ini, terutamanya melalui penekanan yang diberikan terhadap kelestarian, inklusiviti, sistem makanan yang mapan serta kepelbagaian tema melibatkan jantina, belia dan kumpulan etnik orang asal dalam mencapai Agenda 2030.

Kerangka strategi berkenaan turut memberi fokus memperkasa kerjasama dan mencapai impak bagi *The Four Betters; Better Production, Better Nutrition, Better Environment* dan *Better Life* yang berhubungkait antara dimensi sistem rantai makanan iaitu ekonomi, sosial dan alam sekitar.

Di peringkat serantau, Delegasi Malaysia mengetengahkan keutamaan memacu transformasi inovasi dan digital dalam penggubalan dasar dan halatuju sektor pertanian. Malaysia turut menyarankan FAO untuk mengaplikasi dan memanfaatkan sumber-sumber berkaitan dalam menyokong pelaksanaan projek dan program di bawah *Regional Conference for Asia and the Pacific (APRC)* yang mampu memberi dimensi dalam memperkasakan lebih banyak negara-negara membangun melalui kerjasama dalam sektor pertanian dan makanan, terutamanya di dalam bidang teknologi dan inovasi, pertukaran kepakaran teknikal, pembangunan kapasiti serta perkongsian pengetahuan.

Secara keseluruhannya, pencapaian utama bagi Persidangan FAO kali ke-42 ini memfokuskan kepada cabaran yang dihadapi oleh komuniti dunia pada hari ini, merangkumi kesan penularan COVID-19, akses kepada diet sihat, kemiskinan dan jurang yang taraf hidup, malah turut melibatkan isu-isu lain seperti malnutrisi dan ketidaktentuan jaminan bekalan makanan.

**KEMENTERIAN PERTANIAN DAN INDUSTRI MAKANAN**

**19 JUN 2021**